



12. januar 2011

UPA2011/69

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

**Kalaallit Danmarkimi ilinniagaqartut danskit ilinniagaqartut assigalugit tapiissutitigut pisinnaatitaaffiisa assinginik periarfissaqalernissaat pillugu Naalakkersuisut suliniuteqaqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasortaqaq Aleqa Hammond, Siumut)

**Tunnngavilersuut:**

Kalaallit ilinniagaqartut Danmarkimiittut peqatigiiffeqarput Avalak-mik taaguuteqartumik. Avalak aqputigalugu uagut qinikkanut pingaaruteqartuni atukkaminut tunnngassuteqartunik apuussisarput ataatsimeeqatigiumannittarlutillu.

Avalak nutaarsiassanik akuttunnngitsunik nassiussisarpoq aviisinnguartik taannalu aqputigalugu uagutsinnut qinikkanut toqqaannartumik attaveqartarput erseqqissaassutiginiarlugu atukkamik qanoq ittuunerat aammalu qanoq iliornikkut atugarisatik pillugit politikikkut pitsanngorsaasinnaaqataansinnik erseqqissaassuteqartarlutik.

Arlaleriaqalunga kalaallit Danmarkimi ilinniagaqartut ataatsimeeqatigisarsimavakka, pinerillu tamaasa uagut qinikkatut sulisugut erseqqissaavigineqartarpugut Danmarkimi ilinniagaqartuunermi nunatsinniillu ilinniagaqarnersiuteqarnertik peqputigalugu danskit ilinniagaqarnersiuteqartutuulli naligalugit pisinnaatitaaffilerneqartarattillu akuerineqarneq ajortut. Erseqqissaavigineqartarpugut politikikkut naalagaaffeqatigiinnerup iluani ileqqorissaarnikkut ikioqatigiissutigineqartumik naalakkersuinikkut aqputissiuussisoqarsinnaanerinik.

Isumaqpunga kalaallit ilinniartuutitta Danmarkimiittut nunatsinniit ilinniartuunersiuteqartuusut sullinneqartariaqartut danskisut Danmarkimit ilinniagaqarnersiuteqartuusutut inissisimalernissaat anguniarlugu, makku peqputigalugit:

- a) Angallannikkut aningaasartuutigisartakkamikkut akikillisaaffigineqarsinnaalerniassammata
- b) Ineqarnermikkut tapiiffigineqarsinnaalerniassammata
- c) Aningaaserivitsigut atugassaqartinneqarnermikkut periarfissarissaarnerulerniassammata
- d) Danmarkimi ilinniagaqarnersiuteqartunut naligiisinneqarlutik ilinniagaqarnersiutitigut inissisimalerniassammata.

Pitsanngorsaataasut tamakku aqputissiuussisussaapput ilinniagaqartuutitta ulluinnarni atugarisaannut oqilisaataasumik akikillisaataasumik aaqquussuussinernut atuinissaminut periarfissarissaarnerulernissaannut, taamaalillutillu ilinniartut nukitik ilinniarneminnut atorluarnerulersinnaalissavaat periarfissaalatsilluni toqqissiviilliutitut kalaallit ilinniartuunersiutaasa Danmarkimi ilinniartuunersiutaasunut naligiissitaannginnerannik patsiseqartunut nukitik atorunnaarlugit.

Takorloorpara, tamanna anguneqarsinnaassasoq Naalakkersuisut susassaqarfimmi tassani suleqatigisartakkaminnik ingerlatsinikkut assigiinngissutsit ataqqillugit aqputissiuussinerisigut, kalaallit danskillu Danmarkimi ilinniagaqartut ilinniartuunersiuteqarnikkut naligiisinneqarnissaannik qulakkeerinnittumik.

Neriutigaara Inatsisartut tamarmiullutik siunnersuut una katersuuffigiumaaraat, kalaallit ilinniagaqartortatta nunatsinnit ilinniagaqarnersiuteqaraluarlutik danskit ilinniagaqarnersiutaannut naligiisinneqarlutik pisinnaatitaaffeqalernissaat qulakkeerinneqataaffigalugu.

**Siunnersuutip aningaasatigut kingunissai**

Siunnersuutip akuersissutigineqarneratigut Namminersorlutik Oqartussanut inuviaqatigiinnullu aningaasatigut kinguneqarnaviannngilaq.

**Siunnersuutip allaffisornikkut kingunissai**

Naatsorsuutigineqassaaq danskit oqartussaannut saaffiginnissutissap inaarsarneqarnerani AC-mik sulisitsisoqassasoq, taamaattoq taanna AC-mik inuup ataatsip ukiumut suliarisinnaasai (års-værk) ataallugit sulisinneqassasoq ataasiannartumillu suliassalluni Naalakkersuisoqarfiup suliassanik tullerianaanerinerata ataanni naammaseqarsinnaasoq.

**Siunnersuutip Namminersorlutik suliffiutilinnut kingunissai**

Siunnersuut namminersorlutik suliffiutilinnut aningaasatigut allaffisornikkullu kinguneqarnaviannngilaq.